


Ni Pangulong
Thomas S. Monson



“Subong Nga Ako Naghigugma sa Inyo”

Pila ka tuig ang nagligad isa ka abyan nga ginhingadlan kay Louis nagsugid sa akon sang isa ka makatalandog nga sugilanon parte sa iya iloy nga malulo kon maghambal. Sang magtaliwan sia, ginbilinan niya ang iya mga anak sang manggad nga indi pinansyal kundi isa ka palanublion sang manggad sa halimbawa, sa pagsakripisyong pagkamatinumanon.

Pagkatapos nga mahambal ang mga pagdayaw sa namatay kag ang masubo nga biyahe pakadto sa semetryo, ang hamtong nga pamilya nagpanghimos sang diutay nga pagkabutang nga nabilin sang ila iloy. Kaupod sa mga ini, nadiskubrehan ni Louis ang isa ka sulat kagisa ka yabi. Ang sulat nagapanulin: “Sa may kanto nga kwarto, sa naidalom nga hunos-hunos sang akon kabinet, may isa ka magamay nga kahon. Nagaunod ini sang manggad sang akon tagipusuon. Ini nga yabi ang magabukas sang kahon.”

Ang tanan natingala kon ano may ara ang ila iloy nga kamahalalon nga ginkandadohan gid.

Ang kahon ginkuha kon sa diin ini nahamtang kag mahinalungon nga ginbuksan sa bulig sang yabi. Sang gin-usisa ni Louis kag sang iban ang mga unod sang kahon, nakita nila ang solo nga larawan sang tagsa ka anak, upod ang ngalan sang anak kag petsa sang pagkabun-ag. Dayon may nabunot si Louis nga isa ka Valentine card. Sa isa ka simple kag pangbata nga agi, nga iya nakilal-an nga iya agi, iya nga ginbasa ang mga

pulong nga iya ginsulat 60 katuig na ang nagligad:
“Mahal kong Nanay, palangga ko ikaw.”

Ang mga tagipusuon natandog, ang mga tingug naghinay, kag ang mga mata naglinumaw-lumaw. Ang manggad ni Nanay amo ang iya wala'y katapusan nga pamilya. Ang kabaskog sini naghalin sa kaidadalman nga pundasyon sang “Palangga ko ikaw.”

Sa karon nga kalibutan, wala sang iban pa nga lugar nga ang kaidadalman nga pundasyon labi nga ginakinahanglan sangsa panimalay. Kag wala na sang iban pa nga lugar nga ang kalibutan may makita nga mas maayo nga halimbawa sinang kaidadalman nga pundasyon sangsa sa mga puluy-an sang mga Santos sa Ulihing mga adlaw nga naghimo sang gugma nga sentro sang ila pang-pamilya nga pangabuhi.

Sa aton nga nagasugid nga mga sumulunod sang Manluluwas nga si Jesucristo, Iya ginhatag ining malayo-sing-malab-utan nga panulin:

“Ako nagahatag sa inyo sing bag-ong sugo, nga maghigugmaanay kamo; subong nga ako naghigugma sa inyo, nga kamo man maghigugmaanay.

“Sa sini ang tanan nga tawo makahibalo nga kamo mga gintutun-an ko, kon maghigugmaanay kamo.”¹

Kon sundon naton ang kasuguan nga magpalanggaanay, kinahanglan naton kabigon ang kada isa sing may kalulo kag respeto nga nagapakita sang aton gugma sa adlaw-adlaw nga pagpakig-angot. Ang gugma nagatanyag sing malulo nga pulong, mapasensyahan nga sabat, isa

ka indi maiayiyahon nga buhat, isa ka mahinangpanon nga dulungan, isa ka mapinatawaron nga tagipusuon. Sa tanan naton nga mga kaangtanan, ang mga ini kag ang iban pa nga mga kinaiya makabulig nga mangin athagon ang gugma nga yara sa aton mga tagipusuon.

Si Pangulong Gordon B. Hinckley (1910–2008) nakanapilag: “Ang gugma . . . amo ang tibod sang bulawan sa punta sang balangaw. Apang mas labi pa ini sa punta sang balangaw. Ang gugma yara man sa ginsuguran, kag gikan sa sini naggwa ang katahum nga nagakurba sa kalangitan sa mabagyuhon nga adlaw. Ang gugma amo ang kasiguruhan nga ginahibian sang mga bata, ang handum sang mga lamharon, ang panapik nga nagahugpong sang pag-asawahay, kag ang pangpadanlog nga amo ang naga-paiway sang makaguba nga pagbanggianay sa puluy-an; amo ini ang kalinong sang pagtigulang, ang kasanag sang paglaum nga nagasilak sa tunga sang kamatayon. Daw ano kamanggaran sa ila nga nagakalipay sini sa ila pag-inupdanay upod ang ila pamilya, mga kaabyanan, simbahon, kag mga kasilingan.”²

Ang gugma amo ang pinakakahulugan sang ebanghelyo, ang pinakadungganon nga kinaiya sa tawhanon nga kalag. Ang gugma amo ang kaumpawan sang nagaantos nga mga pamilya, nagabalatian nga mga kumunidad, kag masakitong nga mga pungsod. Ang gugma amo ang isa ka yuhum, isa ka kaway, isa ka maayo nga komento, kag isa ka pagdayaw. Ang gugma amo ang pagsakripisyoy, pag-alagad, kag pagka-di-maiayiyahon.

Mga bana, higugmaa ang inyo mga asawa. Tratoha sila nga may dignidad kag pagpasalamat. Mga kauturan nga babayi, higugmaa ang inyo mga bana. Tratoha sila nga may pagpasidungog kag may pagpaisog.

Mga ginikanan, palanggaang inyo mga kabataan. Mag-pangamuyo para sa ila, tudlo sila, kag magpanaksihon sa ila. Mga kabataan, palanggaang inyo mga ginikanan. Ipakita sa ila ang pagtahod, kapasalamat, kag pagtuman.

Kon wala ang putli nga gugma ni Cristo, laygay ni Mormon, “wala-wala gid [kita].”³ Ang akon pangamuyo amo nga kabay nga sundon naton ang laygay ni Mormon nga “magpangamuyo sa Amay sa bug-os nga ikasarang sang tagipusuon, agud mapuno [kita] sa sining gugma, nga iya ginahatag sa tanan nga matuod nga mga sumulunod ang iya Anak nga si Jesucristo, agud mahimo [kita] nga mangin mga anak sang Dios, agud kon sia magapakita mangin subong kita sa iya.”⁴

MGA TANDA

1. Juan 13:34-35.
2. Gordon B. Hinckley, “And the Greatest of These Is Love,” *Ensign*, Mar. 1984, 3.
3. Moroni 7:46; tan-awa man sa bersikulo 44.
4. Moroni 7:48.

PAGTUDLO GIKAN SA SINING MENSAHE

Si Pangulong Monson nagatudlo sa aton sang kaimportante sang pagpakita sang matuodtuod nga Cristohanon nga gugma, ilabi na sa puluy-an. Binagbinaga ang pagpangabay sa ila nga inyo ginabisitahan nga magtipon bilang isa ka pamilya kag hambalan ang mga paagi nga sila sarang magpakita sang dugang pa nga pagpalangga sa isa kag isa. Ayhan mahimo ninyo sila paisugon sa pagpili sang isa sinang mga ideya kag mag-plano agud malab-ot ini bilang isa ka pamilya. Pareho abi, ang mga miyembro sang pamilya mahimo nga mag-tanyag sing isa ka sekreto nga pag-alagad sa lain nga miyembro sang pamilya sa tagsa ka semana. Mahimo ninyo sila pangabayon nga sa ulihi ila pamensaron kon paano ang pagtinguha sa paglab-ot sang ila lalab-uton nagpadugang sang pagpalangga sa ila puluy-an.

LAMHARON

Nagapangamuyo para sa Kalinong

Ni Sarah T.

Ang akon mga ginikanan pirme nagatambong sa mga miting tapos simba, kag ginabantayan ko ang akon tatlo ka mga manghod nga lalaki kag ginabuligan sila nga maghimo sang ila panyaga—bisan nga masami sila madali maakig kag ginagutom. Sa masami kon nagaugod na sila inaway, madali ko lang masolbar ang magamay nga problema. Apang kon kaisa mabudlay magpatuga sang kalinong kon ang pag-inaway nagsugod na tungod kay nagkairitar ako.

Isa ka hapon, ang akon mga utod nabudlayan gid magpakigbagay sa isa kag isa. Natalupangdan ko nga ang akon pagtinguha nga magpatuga sang kalinong nagpalala pa gid sang sitwasyon tungod akig na ako. Gani naghimo lang ko sang akon kaugalingon nga palanyagahon kag nag-untat sa paghambal. Sang ulihi, naghambal ako, “Mangamuyo ako. Pwede kita maghipos sing makadali?” Sang nagpahimuyong na sila, nag-pangamuyo ako nga bendisyunan ang pagkaon. Antes

ko gintapos ang pangamuyo, gindugang ko, "Kag pali-hog buligi kami nga mangin manugtuga sing kalinong."

Sang primero, dawsa wala lang sila nakabati kag nagsugod naman sing inaway. Natak-an ako apang nahibaloan ko nga kinahanglan ko nga mangin mapi-nalanggaon kag kalmado kutob sa akon masarangan tungod bag-o lang ako nagpangamuyo para sa kalinong. Pagkatapos sang isa ka minuto, nakabatyag ako sing tuman nga kakalma. Nagkaon ako nga wala sing huluhambal kag ang mga bata sang ulihi nag-untat sing ilinaway. Akon natukiban nga ang kalinong nga akon nabatyagan amo ang sabat sa isa ka simple nga pangamuyo. Nagpangamuyo ako nga mangin tagtuga sing kalinong, kag ang Amay nga Langitnon nagbulig sa akon nga magpabilin nga kalmado sang tinion nga daw masinggit na ako. Nakahibalo ako nga matuod gid nga lya kita hatagan sing kalinong.

Ang tagsulat nagaistar sa Arizona, Estados Unidos sang Amerika.

MGA KABATAAN

Matuodtuod nga Manggad

Si Pangulong Monson nagsugid sang isa ka estorsya parte sa isa ka iloy nga may isa ka kahon sang manggad. Sang ginbuksan sang iya mga kabataan ang kahon, ila nakita ang ila kaugalingon nga mga litrato. Ang manggad sang iloy amo ang iya pamilya!

Ang matuodtuod nga manggad indi bulawan ukon mga alahas—ini amo ang mga tawo nga imo palangga. Sin-o ang inyo ginapalangga? Magdrowing sang isa ka kahon sang manggad nga may mga litrato nila ukon mga ngalan nila sa sulod sang kahon.



Ang Pagpasag-uli ni Jesucristo Isa ka Ebidensya sang Gugma sang Dios

Tun-i sing mainampion ining materyal kag magpangamuyo agud mahibaloan kon ano ang ipaambit.

Pagtuo, Pamilya, Bulig

Ang paghangop nga ang aton Amay nga Langitnon naghatag sang Iya Bugtong nga Inanak agud nga makaangkon kita sang kabuhi nga wala'y kamatayon kag sang potensyal para sa wala'y katapsan nga kabuhi nga nagabulig sa aton nga mabatyagan ang wala'y dulunan kag indi matungkad nga gugma sang Dios para sa aton. Ang aton Manluluwas nagahigugma man sa aton.

“Sin-o bala ang magapahamulag sa aton sa gugma ni Cristo? . . .

“Kay ginatalupangod ko nga bisan ang kamatayon ukon kabuhi, ukon mga manugtunda, ukon mga punoan, ukon mga gahum, ukon mga butang nga sa karon, ukon mga butang nga palaabuton,

“Ukon kataasan, ukon kadalman, ukon bisan ano nga iban nga tinuga, indi sarang makapahamulag sa aton sa gugma sang Dios nga yara kay Cristo Jesus nga aton Ginuo”(Mga Taga-Roma 8:35, 38–39).

Parte sa Pagpasag-uli [Atonement] ni Jesucristo, si Elder D. Todd Christofferson sang Korum sang

Napulo'g Duha ka mga Apostoles nagsiling: “Ang pag-antos sang Manluluwas sa Getsemani kag ang Iya kasakit sa krus nagatubos sa aton gikan sa sala paagi sa pagsabat sang mga ginapangayo sang hustisa sa aton. Iya ginadab-ot ang kaluoy kag ginapatawad sila nga nagahinulsol. Ang Pagpasag-uli ni Jesucristo nagsabat man sang utang nga ginapangayo sang hustisa sa aton paagi sa pag-ayo kag pagbayad sang konano man nga pag-antos nga aton inosente nga ginbatas. ‘Kay yari karon, pagaantuson niya ang mga kasakit sang tanan nga mga tawo, huo, ang mga kasakit sang tagsa ka nagakabuhi nga tinuga, alangay nga mga lalaki, mga babayi, kag mga kabataan nga katapo sang panimlay ni Adan’ (2 Nefi 9:21; tanawa man sa Alma 7:11–12).¹

Si Cristo “nagtigib sa [aton] sa mga palad sang [Iya] mga kamot” (Isaias 49:16). Si Linda K. Burton, Pangkabilugan nga Pangulo sang Relief Society nagsiling, “Ang inang pinakamataas nga buhat sang gugma dapat nga magpaluhod sang aton sa mapainubuson

nga pagpangamuyo sa pagpasalamat sa aton Amay nga Langitnon sa paghigugma sa aton sing husto sa bagay nga Iya ginpadala ang Iya Bugtong kag perpekto nga Inanak sa pag-antos para sa aton mga sala, aton mga kasakit sang balatyagon, kag sa tanan nga indi patas sa aton indibidwal nga mga kabuhi.”²

Dugang nga Balaan nga mga Kasulatan kag Impormasyon
Juan 3:16; 2 Nefi 2:6–7, 9;
reliefsociety.lds.org

MGA TANDA

1. D.Todd Christofferson, “Redemption,” *Liahona*, Mayo 2013, 110.
2. Linda K.Burton, “Is Faith in the Atonement of Jesus Christ Written in Our Hearts?” *Liahona*, Nob. 2012, 114.

Binagbinaga Ini

Paano bala naton mapabutyag ang aton kapasalamatang paghigugma sa Dios kag kay Jesucristo para sa dulot sang Pagpasag-uli sang aton Manluluwas?